

20 JUN 2002

Mahathir-DEB

KECAMAN TERHADAP DEB TAK BERASAS, KATA PM

KUALA LUMPUR, 20 Jun (Bernama) -- Kecaman terhadap Dasar Ekonomi Baru (DEB) kononnya ia tidak membawa kebaikan kepada orang Melayu dan Bumiputera lain adalah tidak berasas dan hanya kerana terikut-ikut orang asing, kata Perdana Menteri Datuk Seri Dr Mahathir Mohamad hari ini.

Beliau berkata apabila orang asing dan media mereka mula menuduh kononnya DEB hanya menguntungkan beberapa kroni kerajaan, tanpa usul periksa pembangkang Melayu menyambut tuduhan ini dan mengecam DEB.

Pembangkang berkenaan sanggup melihat orang Melayu gagal dan merana asalkan mereka mendapat "political mileage" daripada tuduhan ini, katanya ketika menyampaikan ucapan Presiden pada Perhimpunan Agung Umno di Dewan Merdeka, Pusat Dagangan Dunia Putra di sini.

"Tidakkah mereka sedar orang asing ini mempunyai agenda yang lain dan mereka tidak suka melihat orang Melayu berjaya, terutama kerana kita dapat mempertahankan kebebasan kita, budaya kita?" tanya Presiden Umno itu.

Golongan orang Melayu ini lupa sama sekali akan peluang dan biasiswa yang membolehkan ratusan ribu anak Melayu yang dahulu tidak mungkin berpelajaran tinggi, menuntut pelbagai ilmu sehingga ke peringkat universiti, katanya.

Selain itu, mereka tidak sedar bahawa semua Naib Canselor universiti terdiri daripada orang Melayu, demikian juga majoriti profesor dan pensyarah.

"Mereka tidak menghargai lebih 40 dana yang diadakan untuk membantu peniaga Melayu di semua peringkat, dan puluhan ribu kontrak yang diberi kepada beribu-ribu kontraktor Melayu.

"Mereka tidak ambilkira ribuan lesen, AP, dan saham-saham syarikat orang lain yang diperuntukkan kepada beribu-ribu orang Melayu melalui Akta Penyelarasan Industri," katanya.

Modal RM3 bilion turut disediakan kerajaan kepada Permodalan Nasional Bhd (PNB) yang menubuhkan beberapa Saham Amanah yang berjaya menjadikan 7.28 juta Melayu pemilik saham syarikat-syarikat besar di Malaysia dengan jumlah pelaburan sebanyak RM34.89 bilion.

Saham-saham yang diperuntukkan kepada PNB adalah hasil penyusunan semula atau penubuhan syarikat-syarikat baru yang disyaratkan oleh DEB supaya menjual 30 peratus daripada saham mereka kepada Bumiputera.

"Sesungguhnya jika tidak kerana PNB, Saham Amanah dan badan-badan milik kerajaan yang diurus khas untuk orang Melayu, hari ini pencapaian Dasar Ekonomi Baru hanyalah dua peratus sahaja.

"Sebabnya ialah apabila saham dijual kepada pelabur Melayu, mereka terus menjual balik saham itu kepada bukan Bumiputera. Demikian juga dengan lesen, AP dan kontrak yang diberikan kepada mereka," katanya.

Beliau berkata orang Melayu, walaupun tiada kekurangan dari segi kebolehan, ada yang tidak berjaya setelah diberi peluang berkali-kali dan setelah dibantu dengan pelbagai kemudahan dan juga wang.

"Sebabnya ialah (di sini saya pohon ampun dan maaf daripada orang Melayu) kerana mereka tidak rajin iaitu mereka malas dan suka kepada jalan yang mudah dan cepat, tidak kira apa akibatnya," katanya.

Keinginan cepat kaya menyebabkan apabila diberi lesen, lesen dijual; apabila diberi AP untuk import, AP dijual; apabila diberi kontrak, kontrak dijual untuk dapat wang tunai, kata Dr Mahathir.

"Tidak ada kerja yang dibuat selain daripada merapat orang yang berpengaruh dan berkuasa untuk mendapat sesuatu kerana mereka Melayu,

mereka Bumiputera. Setelah dijual dan mendapat wang, maka mereka datang lagi, minta lagi.

"Sesungguhnya saya berasa amat malu menyatakan semua ini, terutama di hadapan orang lain, di hadapan seluruh negara, di hadapan dunia. Tetapi mereka sudah pun tahu semua ini. Saya bukan mendedah perkara yang belum diketahui. Saya cuma sebut apa yang diketahui umum," katanya.

Dr Mahathir berkata hanya segelintir peniaga, kontraktor dan pengusaha Melayu yang tidak menjual peluang yang diberi kepada mereka untuk mendapat keuntungan cepat. Mereka ini tekun berusaha dan ada antara mereka yang berjaya.

Melihat bahawa mereka tidak menggagalkan Dasar Ekonomi Baru, Kerajaan memberi lebih banyak peluang kepada mereka sehingga mereka muncul sebagai orang yang berjaya dalam perniagaan, katanya.

Malangnya apabila ini berlaku timbul perasaan hasad dengki dan tuduhan bahawa mereka adalah kroni kerajaan, kroni pemimpin kerajaan, katanya.

Katanya, jika tidak hendak dituduh mengamalkan kronisme, kerajaan boleh membiarkan perniagaan orang Melayu tidak berjaya, terus gagal dan bankrap.

Dengan itu tidak akan ada sesiapa pun daripada orang Melayu yang akan berjaya dan Kerajaan akan bebas daripada tuduhan mengamalkan kronisme, katanya.

Namun kerajaan tidak juga akan terlepas daripada dikecam kerana bila yang menjadi "millionaires" dan "billionaires" terdiri daripada bukan Melayu dan orang Melayu hanya menjadi pemandu kereta besar milik orang dan menjadi kuli orang lain, katanya.

"Sesungguhnya jika pembangunan usahawan dan peniaga Melayu yang berjaya tidak dibebankan ke atas bahu kerajaan, pembangunan negara akan menjadi lebih mudah, lebih tinggi dan lebih cepat.

"Yang melambatkan pembangunan negara ialah kerana kerajaan cuba dan terus mencuba untuk mengimbangkan ekonomi orang Melayu dengan orang bukan Melayu di semua peringkat, dalam semua bidang," katanya.

Presiden Umno itu juga berkata walaupun DEB tidak berjaya sepenuhnya, jurang perbezaan di antara Bumiputera dengan bukan Bumiputera telah dapat dikurangkan.

Sementara bandar-bandar di Malaysia mempunyai segala kemudahan yang terdapat di negara-negara maju, kawasan luar bandar juga telah dibangunkan dengan infrastruktur yang baik.

"Purata pendapatan seseorang atau "per capita income" yang hanya 300 dolar Amerika di waktu kita mencapai kemerdekaan, hari ini adalah sebanyak 4,000 dolar Amerika dengan kuasa membeli sebanyak 10,000 dolar Amerika.

"Masih ada mereka yang miskin tetapi peratusannya telah berkurangan daripada hampir 50 peratus kepada hanya tujuh peratus," tambahnya.

-- BERNAMA  
MAD AZZ MOZ